

Na osnovu člana 14. Sporazuma o konačnom raspolaganju svim pravima i obavezama na pokretnoj imovini koja će i dalje služiti za potrebe odbrane (Sporazum zaključen između Vijeća ministara Bosne i Hercegovine, Vlade Federacije Bosne i Hercegovine i Vlade Republike Srpske, 27. marta 2008. godine u Doboju), zaključuje se

## **ANEKS SPORAZUMA**

### **O KONAČNOM RASPOLAGANJU SVIM PRAVIMA I OBAVEZAMA NA POKRETNJOJ IMOVINI KOJA ĆE I DALJE SLUŽITI ZA POTREBE ODBRANE**

Između sljedećih ugovornih strana:

- 1. BOSNE I HERCEGOVINE, VIJEĆE MINISTARA BOSNE I HERCEGOVINE,** koje zastupa ministar odbrane Bosne i Hercegovine, gospodin Zukan Helez
- 2. FEDERACIJE BOSNE I HERCEGOVINE, VLADA FEDERACIJE BOSNE I HERCEGOVINE,** koju zastupa ministar energije, rudarstva i industrije u Vladi Federacije Bosne i Hercegovine, gospodin Vedran Lakić
- 3. REPUBLIKE SRPSKE, VLADA REPUBLIKE SRPSKE,** koju zastupa ministar trgovine i turizma u Vladi Republike Srpske, gospodin Denis Šulić

Na osnovu odobrenja Savjeta ministara Bosne i Hercegovine broj: 05-07-1-902-6/24 od 09.04.2024. godine,

Na osnovu odobrenja Vlade Federacije Bosne i Hercegovine broj: 1762/2022 od 08.12.2022. godine, i

Na osnovu odobrenja Vlade Republike Srpske broj: 04/1-012-2-1946/23 od 01.06.2023. godine

#### **Član 1 (Predmet Aneksa)**

- (1) Ovim Aneksom, u skladu sa Sporazumom o konačnom raspolaganju svim pravima i obavezama na pokretnoj imovini koja će i dalje služiti za potrebe odbrane (u daljem tekstu: Sporazum), propisuje se postupak i procedura komisione prodaje i izvoza viškova pokretne imovine koja je u skladu sa članom 4. Sporazuma vlasništvo Bosne i Hercegovine – Ministarstva odbrane Bosne i Hercegovine.

- (2) Imovina iz stava (1) ovog člana je imovina slijedećih kategorija:
- a) viškovi naoružanja, municije i minsko eksplozivnih sredstava (u daljem tekstu: N i MiMES),
  - b) sekundarne sirovine nastale u procesu delaboracije i/ili uništenja kategorije iz tačke a) ovog stava (u daljem tekstu: sekundarne sirovine),
- (3) Pored predmeta iz stava (1) i (2) ovog člana, ovim Aneksom se određuje način određivanja organa i pravnih lica za ugovaranje, promet, prodaju i izvoz te rokovi vezani za iste, raspodjela sredstava ostvarenih komisionom prodajom i druga pitanja od značaja za prodaju i izvoz pokretne imovine propisane Sporazumom i ovim Aneksom (u daljem tekstu: Imovina).

## **Član 2.**

### **(Određivanje organa i pravnih lica)**

- (1) Savjet ministara Bosne i Hercegovine (u daljem tekstu: Savjet ministara BiH) ovim Aneksom određuje Ministarstvo odbrane Bosne i Hercegovine (u daljem tekstu: Ministarstvo) da izvrši prodaju i izvoz pokretne vojne imovine propisane Sporazumom i članom 1. stav (2) ovog Aneksa u saradnji sa organima iz stava (2) ovog člana, na način propisan ovim Aneksom, zakonom i relevantnim odlukama Predsjedništva Bosne i Hercegovine.
- (2) Vlada Federacije Bosne i Hercegovine (u daljem tekstu: Vlada FBiH) i Vlada Republike Srpske (u daljem tekstu: Vlada RS), svojim odlukama određuju i zadužuju pravna lica koja će kao Komisionari u svoje ime, a za račun Bosne i Hercegovine (u daljem tekstu: BiH) kao vlasnika imovine i svog Komitenta da prodaju i izvezu Imovinu propisanu Sporazumom i članom 1. stav (1) i (2) ovog Aneksa. Komisiona prodaja se vrši u saradnji sa Ministarstvom i u skladu sa relevantnim propisima koji regulišu obligacione odnose u Bosni i Hercegovini.
- (3) Pravna lica koje odlukama odrede vlade entiteta (u daljem tekstu: Komisionari) su ona koja su upisana u Registar lica koja se bave vanjskotrgovinskim prometom oružja, vojne opreme i roba posebne namjene koji se vodi u Ministarstvu spoljne trgovine i ekonomskih odnosa BiH za obavljanje poslova propisanih ovim Aneksom.
- (4) Pravna lica koja odredi Vlada FBiH ugovaraju prodaju i izvoz Imovine koja potiče iz Federacije Bosne i Hercegovine (u daljem tekstu: FBiH), a pravna lica koja odredi Vlada RS ugovaraju prodaju i izvoz Imovine koji potiče iz Republike Srpske (u daljem tekstu: RS).
- (5) Izuzetno iz odredbi od stava (1) do (4) ovog člana, Ministarstvo prodaje Imovinu i putem svog Pravilnika o materijalno finansijskom poslovanju. Ukoliko Ministarstvo odluči da određenu imovinu prodaje ovim načinom o tome informiše komisionare u roku od 15 dana od dana donošenja ove odluke. Imovina koja se nalazi na listi iz člana 4. ovog Aneksa i za koju je započet proces komisione prodaje ne može biti predmet prodaje određene ovim stavom.

**Član 3.**  
**(Postupak prodaje)**

- (1) Prodaja Imovine iz člana 1. stav (2) tačka a) vrši se primjenom postupka javnog tendera i postupka komisijone prodaje. Ukoliko postoji interes kupaca i izuzetno od odredbi člana 11. ovog Aneksa, proces prodaje Imovine iz člana 1. stav (2) tačka b) može se vršiti na isti način.
- (2) Postupak javnog tendera provodi se u skladu sa relevantnim propisima koji regulišu prodaju imovine u vlasništvu Bosne i Hercegovine, a prema Planovima prodaje imovine iz člana 1. stav (2) ovog Aneksa (u daljem tekstu: Planovi prodaje), koje donosi Ministar odbrane.
- (3) Postupak komisijone prodaje vršiće Komisionari uz kontrolu i nadzor Ministarstva.

**Član 4.**  
**(Prava i obaveze)**

- (1) Postupak komisijone prodaje počinje tako što Ministarstvo dostavlja Komisionarima listu Imovine koja je spremna za proces komisijone prodaje. Navedena lista sadrži sve podatke i specifikacije neophodne za proces prodaje i izvoza koja uključuje ali se ne ograničavaju na naziv sredstava, vrstu, model, kalibar, jedinicu mjere, količinu, lokaciju i entitetsko porijeklo.
- (2) Listu iz stava (1) ovog člana Ministarstvo dostavlja 7 dana od dana izrade Pregleda propisanog članom 6. stav (2) i Pregleda propisanog članom 11. stav (2) ovog Aneksa. Predmetna lista se ažurira jednom godišnje ili češće po potrebi.
- (3) Nakon dostavljanja predmetne liste Komisionari se smatraju ovlaštenima da preduzimaju sve radnje neophodne za uspješno izvršenje postupka prodaje i izvoza na način kako je to propisano Sporazumom, ovim Aneksom i relevantnim zakonima.
- (4) U okviru postupka komisijone prodaje Komisionari pokreću pregovarački postupak prodaje i dodjele ugovora o kupovini Imovine, ako su ispunjeni slijedeći uslovi:
  - a) Ukoliko su potencijalni kupci Komisionarima putem pisma o namjerama, potvrdom narudžbe ili slično, izrazili namjeru i zainteresovanost za kupovinu viškova Imovine,
  - b) Ukoliko potencijalni kupci prihvataju cijene sredstava koje je utvrdila Komisija iz člana 7. ovog Aneksa i visinu komisijone provizije iz člana 9. ovog Aneksa, i
  - c) Da prihvataju remont naoružanja do nivoa funkcionalne upotrebljivosti istog u proizvodnim i remontnim kapacitetima iz člana 8. ovog Aneksa, ukoliko je to potrebno radi prodaje i izvoza te predviđeno ugovorom. Ukoliko kupci prihvataju kupovinu Imovine u zatečenom stanju po cijenama iz tačke c) ovog stava remont se neće vršiti.

- (5) U okviru postupka komisione prodaje Ministarstvo vrši kontrolu i nadzor procesa prodaje, i to:
- a) Na pismeni zahtjev izvoznika, kupcima omogućava uvid u stanje, kvantitet i kvalitet sredstava za čiju su kupovinu zainteresovani na lokacijama Oružanih snaga BiH,
  - b) Po sklopljenom ugovoru sa kupcem vrši sve potrebne korake na rezervisanju, odvajanju, osiguranju i pripremi Imovine obuhvaćene predmetnim ugovorom o izvoznom poslu.
  - c) U skladu sa zakonom izvršava obilježavanje municije i malog i lakog naoružanja koje je obuhvaćeno ugovorima o izvoznom poslu.
  - d) Obavlja provjeru Dokumenta o krajnjem korisniku i potrebne dokumentacije za pokretanje postupka dobijanja dozvole za izvoz kako je propisano zakonom.
  - e) Po dobijanju dozvole za izvoz omogućiti preuzimanje sredstava koja su obuhvaćena dozvolom, odnosno konkretnim ugovorom o izvoznom poslu.

#### **Član 5.**

##### **(Saradnja sa privrednim društvima)**

- (1) Ograničene količine viškova Imovine, na zahtjev, mogu kupiti i privredna društva koja su upisana u Registar pravnih lica kojima je izdata dozvola za proizvodnju i remont naoružanja i vojne opreme, a koji se vodi u Ministarstvu spoljne trgovine i ekonomskih odnosa BiH, i to:
  - a) Ukoliko Imovinu kupuju u svrhu istraživanja i razvoja, prezentacije, obuke i drugih potreba vezanih za vlastitu proizvodnju ili remont,
  - b) Ukoliko prihvataju prodajne cijene koje odredi Komisija iz člana 7. ovog Aneksa.
  - c) Ukoliko je Ministarstvo odbrane BiH dalo odobrenje.
- (2) Privredna društva i remontni zavodi iz stava (1) ovog člana, kupoprodajni ugovor zaključuju sa pravnim licima iz člana 2. stav (2) ovog Aneksa.
- (3) Ugovori iz prethodnog člana podliježu plaćanju poreza na dodatnu vrijednost (PDV) od strane kupca.

#### **Član 6.**

##### **(Pregled viškova imovine)**

- (1) Predmet prodaje i izvoza su viškovi naoružanja koji su utvrđeni Rješenjem Ministarstva broj:11-03-25-2332/09 od 14. maja 2009. godine, a koji do sada nisu bili predmet donacija i uništenja i viškovi MiMES koji su u skladu sa izvršenim kontrolno-tehničkim pregledima određeni za prodaju.

- (2) Pregled viškova Imovine koji potiču iz FBiH i koji potiču iz RS, sa svim podacima i specifikacijama neophodnim za prodaju, kako je propisano članom 4. stav (1) ovog Aneksa, izrađuje Ministarstvo u roku od 60 dana od dana potpisivanja ovog Aneksa.
- (3) Pregled iz stava (2) ovog člana Ministarstvo dostavlja Komisionarima na način propisan članom 4 stav (1) ovog Aneksa.

#### **Član 7.**

##### **(Formiranje početne prodajne cijene)**

- (1) Pojedinačne početne prodajne cijene Imovine, bez obzira na entitetsko porijeklo sredstava, predlaže Komisija sastavljena od po jednog predstavnika Ministarstva, Vlade FBiH i Vlade RS.
- (2) Vlada FBiH i Vlada RS dostavljaju Ministarstvu imenovanja svojih predstavnika Komisije iz stava (1) ovog člana u roku od 15 dana od dana potpisivanja ovog Aneksa. Ministarstvo u roku od 7 dana od dana dostavljanja predmetnih imenovanja saziva i formira Komisiju za predlaganje pojedinačne početne prodajne cijene Imovine.
- (3) Komisija iz stava (1) ovog člana predlaže početne prodajne cijene po propisanim normama uvidom u predmetnu Imovinu na lokacijama Oružanih snaga BiH. Određene početne cijene treba da budu odraz stanja i kvaliteta svakog sredstva uključujući količinu, stanje pakovanja- ambalaže i imajući u vidu tržišne cijene viškova u regionu i šire.
- (4) Komisija iz stava (1) ovog člana dostavlja prijedlog cijena ministru odbrane na odobravanje.

#### **Član 8.**

##### **(Stanje Imovine koja je predmet prodaje)**

- (1) Imovina se prodaje u viđenom i zatečenom stanju dok se izuzetno viškovi naoružanja mogu izvesti iz BiH u stanju njihove funkcionalne upotrebljivosti, ukoliko ugovorom o prodaji nije drugačije utvrđeno.
- (2) Ukoliko se funkcionalno neupotrebljivo naoružanje želi kupiti u stanju funkcionalne upotrebljivosti, kupci se ugovorom obavezuju da isto poprave i remontuju u proizvodnim i remontnim kapacitetima namjenske industrije u Bosni i Hercegovini.
- (3) Opravka i remont do funkcionalne upotrebljivosti ili eventualna modernizacija naoružanja između kupca te proizvodnih i remontnih kapaciteta iz stava (2) ovog člana uređuje se posebnim komercijalnim ugovorima.

**Član 9.**  
**(Ugovor i komisiona provizija)**

- (1) Prodaja i izvoz viškova Imovine između izvoznika i kupca uređuje se ugovorom o izvoznom poslu.
- (2) Na nacrtu ugovora iz stava (1) ovog člana prethodno mišljenje daje Pravobranilaštvo Bosne i Hercegovine u zakonskom roku do 15 dana.
- (3) U ugovoru o izvoznom poslu prodajna cijena Imovine koje je utvrdila Komisija iz člana 7. ovog Aneksa, uvećava se za 5% vrijednosti pojedinačnog ugovora koliko iznosi komisionprovizija relevantnog Komisionara za predmetnu Imovinu koja je predmet tog ugovora.
- (4) Obrazac modela ugovora o izvoznom poslu sastavni je dio ovog Aneksa.

**Član 10.**  
**(Pravni okvir)**

Izvoz viškova Imovine mora biti u potpunosti realizovan u skladu sa procedurama koje su propisane Zakonom o kontroli spoljnotrgovinskog prometa oružja, vojne opreme i roba posebne namjene, te ostalim zakonima i propisima koji uređuju ovu oblast.

**Član 11.**  
**(Prodaja sekundarnih sirovina)**

- (1) Komisionari su zaduženi za prodaju Imovine iz člana 1. stav (2) tačka b) ovog Aneksa postupkom javnog nadmetanja-tendera u skladu sa zakonom, ukoliko nije drugačije ugovoreno u skladu sa ovim Aneksom.
- (2) Pregled Imovine iz stava (1) ovog člana, po entitetskoj pripadnosti, izrađuje Ministarstvo u roku od 60 dana od dana potpisivanja ovog Aneksa.

**Član 12.**  
**(Rokovi prodaje Imovine)**

- (1) Rok za prodaju Imovine je dvije godine, izuzev roka za prodaju viškova naoružanja koji je četiri godine od dana potpisivanja ovog Aneksa.
- (2) Viškovi MiMES koji ne budu prodani do roka iz stava (1) ovog člana se uništavaju na način koji utvrdi Ministarstvo, a viškovi naoružanja koji ne budu prodani do roka iz stava (1) ovog člana se prodaju kao sekundarne sirovine na način propisan ovim Aneksom.

- (3) Izuzetno od odredbi stava (2) ovog člana, Imovina se neće uništiti niti prodati kao sekundarna sirovina u slijedećim slučajevima:
- a) Ugovor o prodaji je u postupku zaključivanja i nakon isteka rokova iz stava (1) ovog člana,
  - b) Ugovor o prodaji je u sudskom ili arbitražnom postupku,
  - c) Ministarstvo, uz odobrenje Predsjedništva Bosne i Hercegovine, odluči da zadrži predmetnu Imovinu za potrebe Oružanih snaga BiH ili produži proces prodaje, ukoliko smatra da je to od interesa za Ministarstvo.

**Član 13.**  
**(Raspodjela prihoda od prodaje)**

- (1) Raspodjela sredstava ostvarenih prodajom viškova Imovine vrši u skladu sa članom 7. Sporazuma.
- (2) Kupac Imovine doznačuje Trezoru Bosne i Hercegovine iznos predviđen ugovorom i isti se raspoređuje po slijedećem rasporedu:
  - a) Iznos troškova koje je Ministarstvo imalo u vezi sa prodajom Imovine na račun Ministarstva,
  - b) Iznos utvrđen članom 9. stav (3) ovog Aneksa na račun relevantnog Komisionara,
  - c) 20% od preostalih sredstava se doznačuje na poseban račun Ministarstva u okviru Trezora, i
  - d) Preostalih 80% sredstava se iz trezora, u skladu sa zakonom i relevantnim procedurama doznačuje entitetima u zavisnosti od porijekla Imovine, odnosno ugovora.
- (3) Iznos iz stava (2) tačka a) utvrđuje Ministarstvo za svaki predmetni ugovor ponaosob i uključuje se u odredbe istog. Navedene troškove Ministarstvo računa od dana potpisivanja ovog Aneksa do ugovorom propisanog dana izvršenja ugovora.

**Član 14.**  
**(Riješavanje sporova)**

Svi sporovi nastali u vezi sa izvršenjem ovog Aneksa se najprije rješavaju dogovorom strana u Sporazumu. Ukoliko dogovor nije postignut nadležan je Sud Bosne i Hercegovine.

**Član 15.**  
**(Stupanje na snagu)**

Ovaj Aneks sačinjen je u 6 (šest) primjeraka, po 2 (dva) primjerka stranama u Sporazumu, stupa na snagu danom potpisivanja i sastavni je dio Sporazuma.

Broj: 11-03-23-3309-504/17

Sarajevo, 06.02.2026. godine

Bosna i Hercegovina

Za Vijeće ministara Bosne i Hercegovine


Zukan Helez



Federacija Bosne i Hercegovine

Za Vladu Federacije Bosne i Hercegovine

Vedran Lakić



Republika Srpska

Za Vladu Republike Srpske

Denis Šulić



**Prilog br.1**

**OBRAZAC MODELA UGOVORA O IZVOZONOM POSLU**

Broj \_\_\_\_\_/XX

Zaključen dana \_\_\_\_\_ između:

1. \_\_\_\_\_ (u daljem tekstu IZVOZNIK) koga zastupa \_\_\_\_\_ i
2. Naziv kompanije/kupca \_\_\_\_\_ (u daljem tekstu KUPAC) koga zastupa \_\_\_\_\_ za potrebe krajnjeg korisnika \_\_\_\_\_

**Član 1.**

(Predmet ugovora)

- 1.1. IZVOZNIK se obavezuje da u skladu sa odredbama ovog Ugovora izvrši prodaju i izveze robu KUPCU, u skladu sa dozvolom koju izdaje nadležno ministarstvo BiH. KUPAC, u skladu sa ovim ugovorom i dozvolom preuzima sredstva u viđenom stanju, bez garancija na kvalitet i kompletnost, po slijedećem:

Red. broj	Naziv i specifikacija Imovine koja se prodaje	Količina (kom)
	Podaci se upisuju u ugovor	

**Član 2.**

(Cijena i vrijednost ugovora)

- 2.1. Cijene sredstva iz predmeta ugovora su:

Red. broj	Naziv i specifikacija Imovine koja se prodaje	Količina (kom)	Cijena	Ukupno
	Podaci se upisuju u ugovor			

- 2.2. Vrijednost sredstava iz člana 1. ovog ugovora iznosi \_\_\_\_\_.

- 2.3. Utvrđena cijena iz tačke 2.1. ovog člana ne može se smanjivati po bilo kom osnovu, do i steka roka za preuzimanje sredstava i izvršenja ugovora.
- 2.4. IZVOZNIKU pripada komision provizija od 5% od vrijednosti ugovora iz tačke 2.2. ovog člana.

**Član 3.**  
(Način plaćanja)

- 3.1. Plaćanje ugovorene vrijednosti iz tačke 2.2. člana 2. ovog ugovora, KUPAC će izvršiti avansno po zaključenju ovog ugovora Trezoru Bosne i Hercegovine na propisani način.

**Član 4.**  
(Rok preuzimanja)

- 4.1. KUPAC se obavezuje da sredstva iz člana 1. ovog ugovora, nakon izvršenih uplata iz člana 3. ovog ugovora preuzme iz skladišta Oružanih snaga BiH u roku od 30 dana po dobijanju dozvole za izvoz.

**Član 5.**  
(Prava i obaveze izvoznika i kupca)

- 5.1. IZVOZNIK ima obavezu da, uz odobrenje Ministarstva odbrane BiH omogući KUPCU uvid i pregled sredstava za koje je KUPAC zainteresovan, prije zaključenja, ugovora o izvoznom poslu.
- 5.2. IZVOZNIK ima obavezu da po zaključenju o izvoznom poslu potpiše protokol sa Ministarstvom odbrane BiH o ustupanju i rezervaciji sredstava obuhvaćenim predmetnim ugovorom.
- 5.3. IZVOZNIK je u obavezi da kod nadležnog ministarstva BiH kompletira i podnese aplikaciju (zahtjev) za izdavanje dozvole za izvoz i po dobijanju izvozne dozvole obavještava KUPCA.
- 5.4. IZVOZNIK je dužan da pripremi fakturu, paking listu sredstava i drugu dokumentaciju neophodnu za carinjenje i izvoz sredstava po ugovoru i izvrši carinjenje sredstava.
- 5.5. IZVOZNIK je dužan da KUPCU stavi na raspolaganje sredstva iz ugovora u skladištu OS BiH, nakon izvršenja obaveze KUPCA iz člana 3. ovog ugovora.
- 5.6. KUPAC je u obavezi da IZVOZNIKU dostavi Dokument o krajnjem korisniku sredstava, prije zaključenja ugovora o izvoznom poslu.

- 5.7. KUPAC snosi troškove pakovanja, utovara i transporta sredstava i druge zavisne troškove nastale od preuzimanja sredstava sa lokacija Oružanih snaga BiH do prelaska državne granice BiH.
- 5.8. KUPAC je dužan da prije preuzimanja sredstava iz ovog ugovora izmiri sve obaveze iz člana 2. ovog ugovora.

#### **Član 6.**

(Kvantitativni prijem sredstava)

- 6.1. IZVOZNIK predaje sredstva iz člana 1. ovog ugovora KUPCU u viđenom stanju, u postojećoj ambalaži, a prema asortimanu i količini.
- 6.2. Predstavnik izvoznika i predstavnik kupca izvršiće kvantitativni prijem sredstava u skladištu Oružanih snaga BiH o čemu će biti sačinjen i potpisan zapisnik o prijemu i preuzimanju sredstava.
- 6.3. Ne priznaje se reklamacija na količinu i stanje sredstava iz člana 1. ovog ugovora nakon završenog prijema od strane KUPCA.

#### **Član 7.**

(Rješavanje sporova)

- 7.1. Sve eventualne sporove koji mogu nastati u toku realizacije ovog ugovora, ugovorne strane će prvenstveno rješavati sporazumno.
- 7.2. Sporovi koji se ne mogu riješiti na način određen u prethodnoj tački, biće predati nadležnom sudu.

#### **Član 8.**

(Izmjene i dopune ugovora)

- 8.1. Izmjene i dopune ovog ugovora mogu se vršiti sporazumno u istoj formi.

**Član 9.**

(Raskid ugovora)

- 9.1. Ukoliko IZVOZNIK odnosno KUPAC ne izvršavaju svoje obaveze i prava iz ovog ugovora ili te obaveze i prava ne izvršavaju u rokovima određenim ovim ugovorom, ovaj ugovor se može jednostrano raskinuti.
- 9.2. Ugovorna strana zbog koje je došlo do jednostranog raskida ugovora dužna je namiriti štetu drugoj strani u iznosu od 5% vrijednosti ugovora.

**Član 10.**

(Završne odredbe)

- 10.1. Prava i obaveze iz ovog ugovora ne mogu se prenositi na treće lice, bez prethodnog međusobnog pismenog dogovora ugovornih strana.
- 10.2. Za sve što nije predviđeno ovim ugovorom primjenjivaće se odredbe zakona o obligacionim odnosima u BiH.
- 10.3. Ovaj ugovor sačinjen je i potpisan u 6 (šest) primjeraka od kojih po 2 (dva) primjerka za svaku ugovornu stranu i 2 (dva) primjerka za Ministarstvo odbrane BiH.

**Član 11.**

(Stupanje ugovora na snagu)

- 11.1. Ovaj ugovor stupa na snagu danom obostranog potpisivanja.

IZVOZNIK

DIREKTOR

KUPAC

Ino-kupac

DIREKTOR

SAGLASNOST

Ministarstvo odbrane BiH

**OBRAZLOŽENJE ANEKSA SPORAZUMA  
O KONAČNOM RASPOLAGANJU SVIM PRAVIMA I OBAVEZAMA NA  
POKRETNJOJ IMOVINI KOJA ĆE I DALJE SLUŽITI ZA POTREBE ODBRANE**

**I – Pravni osnov za zaključivanje Aneksa**

Pravni osnov za zaključivanje Aneksa Sporazuma sadržan je u članu 14. Sporazuma o konačnom raspolaganju svim pravima i obavezama na pokretnoj imovini koja će i dalje služiti za potrebe odbrane (Sporazum potpisan od strane Savjeta ministara Bosne i Hercegovine, Vlade Federacije Bosne i Hercegovine i Vlade Republike Srpske, 27. marta 2008. godine u Doboju) koji predviđa odobravanje Aneksa na jednak način kao i sam Sporazum, te da isti postaje njegov sastavni dio danom stupanja na snagu.

**II – Razlozi donošenja Aneksa na Sporazum**

Prodaja, kao jedan od načina za rješavanje viškova N i MiMES, propisana Sporazumom o konačnom raspolaganju svim pravima i obavezama na pokretnoj imovini koja će i dalje služiti za potrebe odbrane (u daljem tekstu: Sporazum) nije sprovedena niti izvršena više od 14 godina. Od potpisivanja Sporazuma nije prodat nijedan komad N i MiMES.

Sporazum je regulisao prodaju, nosioca procesa, raspodjelu sredstava i određene elemente prodaje. Pravilnik o materijalno finansijskom poslovanju MO BiH je regulisao proces direktne prodaje koju bi trebalo da obavlja Ministarstvo odbrane BiH. Pored navedenog načina direktne prodaje, jedan od načina prodaje viškova N i MiMES je komisiona prodaja putem saradnje sa nadležnim entitetskim pravnim licima ovlaštenim i stručnim za obavljanje predmetnih poslova. Takva saradnja je takođe propisana Zakonom o upravi (Službeni glasnik BiH broj: 32/02, 102/09 i 72/17) kao način efektivne saradnje državnih i entitetskih institucija.

Predlaganjem ovog Aneksa i njegovim odobravanjem na raspolaganju će biti dva metoda prodaje čime se stvara pretpostavka za povećanje efikasnosti samog procesa i mogućnost implementacije Sporazuma u cjelosti.

Zaključivanjem Aneksa na Sporazum, u potpunosti se definiše proces komisijone prodaje viškova pokretne imovine i stvaraju se uslovi za dodatne prihode i konsolidaciju budžeta na nivou BiH i entiteta, napuštanje neperspektivnih lokacija Oružanih snaga BiH i značajno smanjenje troškova održavanja tih lokacija i skladišta.

### **III – Osnovna rješenja sadržana u Aneksu Sporazuma**

Član 1. reguliše predmet i sadržaj Aneksa, uključujući važno preciziranje koje vrste imovine su predmet Aneksa. Predmetni član podcrtava neupitnost vlasništva nad imovinom koja je predmet Aneksa i za istu stvara daljnje pretpostavke za regulisanje postupka komisijone prodaje i izvoza.

Član 2. propisuje organe i pravna lica koja obavljaju poslove propisane ovim Aneksom na način kojim se poštuje ustavna struktura Bosne i Hercegovine i nadležnosti svih nivoa vlasti. Vijeće ministara reguliše zadaće Ministarstva odbrane, koje djeluje u skladu sa relevantnim odlukama Predsjedništva BiH. Vlade entiteta se obvezuju da donesu posebne odluke kojim se određuju pravna lica koja će vršiti poslove komisijone prodaje imovine u vlasništvu Bosne i Hercegovine – Ministarstva odbrane BiH u svoje ime i za račun Države BiH. Ovim članom se uspostavlja saradnja državnih i entitetskih organa u postupku rješavanja viškova pokretne imovina koja je predmet Sporazuma i ovog Aneksa u svrhu postizanja cilja propisanog u poglavlju II ovog obrazloženja. Član 2. se također referira na postojanje metoda direktne prodaje koje Ministarstvo odbrane kao vlasnik predmetne prodaje obavlja po sopstvenim pravnim propisima koji su usklađeni za zakonskim okvirom BiH.

Član 3. definiše postupak komisijone prodaje i pravni okvir na koji se takav način prodaje primjenjuje i u skladu sa čim se mora obavljati.

Član 4. utvrđuje set prava i obaveza Komisionara i Ministarstva odbrane BiH u postupku komisijone prodaje te nadzora i kontrole nad cjelim procesom komisijone prodaje viškova. Član 5. propisuje mogućnost koja je relevantna za privredni razvoj u BiH putem podrške namjenskoj industriji u BiH. Predmetni član predviđa da privredna društva za proizvodnju naoružanja i vojne opreme i remontni zavodi, izuzetno mogu kupiti ograničene količine viškova N i MiMES-a u svrhu istraživanja, razvoja, prezentacije, obuke i drugih ekonomskih potreba.

Član 6. se referira na relevantne procedure i odluke neophodne za sigurno sprovođenje procesa komisijone prodaje te propisuje izradu i dostavljanje pregleda viškova imovine.

Član 7. propisuje formiranje stručne Komisije sastavljene od po jednog predstavnika strana u Sporazumu sa zadatkom da odredi početne prodajne cijene za sva sredstva koja su predmet prodaje. Rješenjem da Komisija određuje početne prodajne cijene sredstava za prodaju, strane u Sporazumu direktno štite svoje interese u pogledu planiranja prihoda od prodaje viškova. Zadatak Komisionara koji će biti određeni u skladu sa ovim Aneksom i relevantnim odlukama je da postignu cijenu veću od prodajne i time dodatno utiču na prihode koji se mogu ostvariti u budžetima.

Član 8. propisuje prodaju viškova N i MiMES-a u viđenom i zatečenom stanju uz mogućnost ugovaranja da se sredstva naoružanja mogu remontovati i opraviti u kapacitetima namjenske industrije u BiH kako bi se ista izvezla u stanju njihove funkcionalne upotrebljivosti i time postigla veća prodajna cijena. Ovakvom odredbom u Aneksu Sporazuma, strane u Sporazumu žele da pored prodaje naoružanja što je prihod BiH i entiteta, za duži period (4 godine), uposle kapacitete

namjenske industrije u BiH, i ti kapaciteti ostvare vlastite prihode od opravke i remonta viškova naoružanja.

Član 9. propisuje obavezu zaključenja ugovora o izvoznom poslu i referira se na prilog Aneksa koji sadrži okvirni model tog ugovora, koji nije obvezujući već usmjeravajući za Komisionare i kupce. U ovom članu je također propisana provizija za Komisionara.

Član 10. propisuje pravni okvir sa kojim izvoz, odnosno postupak dobijanja izvozne dozvole mora biti u potpunosti usklađen.

Član 11. reguliše proces prodaja sekundarnih sirovina kao zasebne kategorije imovine koju reguliše ovaj Aneks.

Član 12. reguliše rokove za prodaju imovine i način rješavanja imovine koja ne bude prodana u rokovima iz ovog Aneksa. Član 12 također sadrži izuzetke od primjene predmetnih rokova koji su neophodni za ispunjenje ugovornih obaveza te potreba Oružanih snaga BiH za predmetnom imovinom.

Član 13. propisuje sekvencu i raspored za raspodjele sredstava ostvarenih prodajom pokretne imovine, koji je već propisan članom 7. Sporazuma ali se ovdje detaljnije propisuje te inkorporira i proviziju Komisionara koja nije predviđena samim Sporazumom.

Član 14. reguliše način rješavanja sporova vezanih za predmetni Aneks. Član 15. reguliše stupanje na snagu predmetnog Aneksa.

#### **IV- Finansijska sredstva**

Za provođenje ovog Aneksa nisu potrebna dodatna budžetska sredstva, dok se implementacijom istog očekuje priliv sredstava u budžet Bosne i Hercegovine i budžete entiteta.

#### **V- Zaključna razmatranja**

Postupci i procedure prodaje i izvoza iz BiH viškova naoružanja, municije i MES-a propisane u Aneksu na Sporazum, u potpunosti su u skladu sa zakonima koji uređuju prodaju i izvoz oružja, vojne opreme i roba posebne namjene kao i sa praksom koja se provodi u zemljama regiona i šire. Praksa u zemljama regiona je da se prodaja naoružanja, municije i MES-a vrši preko pravnih lica i kompanija koje prodaju i izvoze viškove u ime i za račun države, a za ovu djelatnost registrovane u skladu sa zakonom.

S obzirom da su komisionari koje odrede vlade entiteta, odnosno izvoznici, pravna lica registrovana u skladu sa zakonom, sasvim je ispravno i zakonito rješenje u Aneksu da se navedena

pravna lica zadužuju za prodaju i izvoz viškova N MiMES-a koja su predmet Sporazuma i Aneksa sporazuma.

Pored toga, potpuno je ispravno i zakonito rješenje u Aneksu Sporazuma da Ministarstvo odbrane BiH vrši nadzor i kontrolu nad cijelim procesom prodaje viškova.

Prednost rješenja o komisionoj prodaji se sastoji u činjenici da će za komisionare-izvoznike biti određena pravna lica koja se već bave predmetnom djelatnosti, već posjeduju potvrde narudžbi od kompanija iz regiona i informacije o široj zainteresovanosti za kupovinu kompletnih viškova municije i preko 50% viškova naoružanja. Njihovo poslovno iskustvo će biti iskorišćeno za maksimizaciju javnih prihoda, čime se na najbolji način ostvaruje javni interes.